

DE LITIGIOSIS.

8.37.1

Impp. Severus et Antoninus AA. Paulinae.

Cum creditor pignus vendit, non potest videri litigiosae rei emptio contrahi, etsi debitor interdicat, ne venditio perficiatur.

PP. k. Mai. Apro et Maximo cons.

[a. 207]

8.37.2

Imp. Constantinus A. ad provinciales.

Lite pendente actiones, quae in iudicium deductae sunt, vel res, pro quibus actor a reo detentis intendit, in coniunctam personam vel extraneam donationibus vel emptionibus vel quibuslibet aliis contractibus minime transferri ab eodem actore liceat, tamquam si nihil factum sit, lite nihilo minus peragenda.

D. k. Aug. Basso et Ablabio cons.

[a. 331]

8.37.3

Imppp. Gratianus Valentinianus et Theodosius AAA. Tatiano pp.

Quicumque rem litigiosam vel ambiguum chirographum, quodlibet denique mobile vel immobile fisco nostro vel potentiore personis in testamento sive codicillo legaverit fidei commiserit aut per hereditatem reliquerit, nullam fisco noster vel alia persona licentiam habeat iurgiorum, nec iudicium subeat, sed aestimatio eius fitis ineatur praestanda his, quibus actiones vel res litigiosae relictas sunt.

1 ¶ Eandem litem ipsi heredes peragant, suarum actionum periculo ea quae litigiosa relictas fuerant vindicantes.

2 ¶ Quod et de chirographis placet, ut heredes relictorum fisco vel aliis personis praesentem pecuniam numerent et iudicio eos, quos obnoxios existimant, persequantur.

D. XV k. Iul. Thessalonicae Gratiano V et Theodosio AA. cons.

[a. 380]